

**Piginnaanngorsaaqqinnissamut ikorsiisarneq pillugu
Inatsisartut peqqussutaata allanngortinnissaq pillugu
Inatsisartut pequssutaat (Piginnaanngorsaaqqittussap
periarfissai annertusarneqarput,
piginnaanngorsartunut tamanut sungiusarnermut
ilinniagaqarnermullu periarfissat annertusineqarput
kiisalu piginnaanngorsarnermut piffissarititaq
ukiunut marlunnut sivikillineqarluni)**

§ 1

Piginnaanngorsaaqqinnissamut ikorsiisarneq pillugu Inatsisartut peqqussutaanni nr. 4, 31. maj 2001-imeersumi imaatunik allannguisoqassaaq:

1. § 4, imm.1, ima oqaasertalerneqassaaq:

"Piginnaanngorsaaqqinnissamik qinnuteqaateqartup inuussutissarsiornikkut siunnerfigiumasaa kommunimit qulaajarneqassaaq suliniutit qulaajaanermik siunertaqartut aqqutigalugit".

2. § 4-imi immikkoortup 2-p kingorna immikkoortoq nutaaq ilanngunneqassaaq:

"Imm. 3. Naalakkersuisut piginnaanngorsaaqqinnissaq sioqqullugu qulaajagassat pillugit maleruagassiisinhaapput".

3. § 6, imm. 1, nr. 4, ima oqaasertalerneqassaaq:

"4) Ilinniagaqarneq, taassumalu ataani allamik ilinniagaqarsinnaaneq".

4. § 7ima oqaasertalerneqassaaq:

"§ 7. Piginnaanngorsaaqqittussat namminersortut pisortalluunniit suliffiini aningaasarsiaqartinneqarlutik sungiusaqqinnissamik imaluunniit ilinniagaqarnissamik neqeroorfingeqarsinnaapput".

5. § 10, imm. 1-imi "ukiut tallimat" ima allanngortinneqassaaq: "ukiut marluk, tamaattoq takuuq imm. 2".

6. § 10-mi, imm. 2, nr. 1-mi aamma 2-mi, "ukiut tallimat" ima allanngortinneqassapput "ukiut marluk".

7. § 16-imi immikkoortup 2-p kingorna immikkoortoq nutaaq ilanngunneqassaaq:

"Imm. 3. Kommunip akissarsianut tapiissutit aningaasaliissutaa annerpaamik ukiumut ilivitsumut tunniunneqartassaaq. Taamaattoq piffissaq akissarsianut tapiissuteqarfiusoq sivitsorneqarsinnaavoq, pissutsit immikkut ittut atuutsillugit".

§ 2

Inatsisartut peqqussutaat manna atuutilerpoq ulloq 1. juli 2006.

Namminersornerullutik Oqartussat, ulloq 1. juni 2006

Hans Enoksen

/

Siverth K. Heilmann

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut